



Embassy of the
United States
MADAGASCAR

FAMPITAM-BAOVAO

Azo avoaka avy hatrany

27 Janoary 2021

Masoivohon'i Etazonia eto Madagasikara

+261/20-23-48000 x 2584 | AntananarivoPress@state.gov

Nanamafy ny Fanohanan'i Etazonia ny OMS ny Ambasadaoro Amerikana Nandritra ny Fihaonany tamin'ny Mpandrindra ny Rafitry ny Firenena Mikambana eto Madagasikara

ANTANANARIVO – Ho fanamafisana ny fanavaozan'i Etazonia ny fahavononany hanohana ny rafitry ny Firenena Mikambana misahana ny fahasalamana OMS dia nitsidika tamin'ny fomba fifanajana ny Mpandrindra ny Rafitry ny Firenena Mikambana eto Madagasikara Issa Sanogo sy ny Solontena maharitry ny OMS Pr. Charlotte Ndiyae ny Ambasadaoro Amerikana Michael Pelletier.

Nohamafisin'i Ambasadaoro Pelletier ny fankasitrahan'ny Filoha Biden ny andraikitra goavana tanan'ny OMS amin'ny ady amin'ny valan'aretina COVID-19, ny fanatsarana ny fahasalamana maneran-tany ary ny fanatsarana ny fiomanana hiatrehana ny valan'aretina toa izao amin'ny ho avy. Notsipihan'ny Masoivoho Amerikana fa amin'ny maha-mpikambana azy ao anatin'ny OMS, i Etazonia dia hanohy hatrany ny andraikiny amin'ny fitarihana ny fitadiavam-bahaolana amin'io valan'aretina io eto Madagasikara sy aty amin'ny faritra misy antsika.

Nandritra io valan'aretina io dia mbola notanan'ny governemanta amerikana ny maha-firenena voalohany azy amin'ny famatsiam-bola an'i Madagasikara eo amin'ny sehatry ny fahasalamana satria 62 tapitriza dolara isan-taona ny vola nomeny hamatsian'ny USAID ireo asa ataony eo amin'ny sehatry ny fahasalamana, toy ny fampihenana ny fahafatesan'ny reny sy ny zaza eto Madagasikara, ny fanatsarana ny fahazoana rano fisotro madio sy ny fidiovana, ny ady amin'ny tazomoka, ny fahazoana tolota fandrindrana ny fainam-pianakaviana, ny fanamafisana ny politikam-pirenena momba ny fahasalamam-bahoaka, ny fiantohana ny lamina famatsiana fanafody sy fitaovana ilaina amin'ny fitsaboana ka ao anatin'izany ny fisorohana, fitiliana ary ny fitsaboana ny COVID-19.

Tamin'ny taona 2020, ny governemanta amerikana dia nanome vola fanampiny 2,5 tapitriza dolara hiatrehana manokana ny COVID-19 toy ny fanaraha-maso ny valan'aretina any amin'ireo toerana lavitra, ny fanabeazana sy ny fanentanana manodidina io aretina io, ary ny fanomezana fitaovana sy tolota ara-pitsaboana. Ny governemanta amerikana dia nanome ihany koa 5 tapitriza dolara ho fanohanana ny Tosika Fameno, tetikasa fanohanana ara-bola ireo fianakaviana sahirana izay mizaka ihany koa ny vokatr'io valan'aretina io. Miara-dalana hatrany amin'ny governemanta sy ny vahoaka Malagasy toy ny "Mpirahalahy mianala" i Etazonia amin'ny fanatanterahana ireo tetikasany izay mifanindran-dalana amin'ny paikady fampandrosoan'ny governemanta Malagasy, ary mbola hanohy izany ezaka izany amin'ny taona 2021.

#